

## জাতীয় বাজেট ২০১৮-১৯ ও জলবায়ু অর্থায়ন জলবায়ু অভিঘাত মোকাবেলা ও সক্ষমতা অর্জনে সুনির্দিষ্ট, অগ্রাধিকার ভিত্তিক এবং অতিরিক্ত বাজেট বরাদ্দ নিশ্চিত করতে হবে

### ১. বাজেটে জলবায়ু অর্থায়ন ব্যবস্থাপনার উন্নয়ন সরকারের একটি প্রশংসনীয় উদ্যোগ

স্বচ্ছতা ও জবাবদিহিতার লক্ষ্য নিয়ে সরকার জাতীয় বাজেটে জলবায়ু অর্থায়ন, বাস্তবায়ন এবং প্রতিবেদন বিষয়ক ব্যবস্থাপনার উন্নয়ন করেছে যা নিসন্দেহে একটি প্রশংসনীয় উদ্যোগ এবং সরকারী অর্থব্যবস্থায় একটি মাইলফলক। যদিও এই ব্যবস্থাটি বৈশ্বিক জলবায়ু অর্থায়ন প্রক্রিয়ায় বাংলাদেশের উদ্যোগ এবং পারফরমেন্সকে পর্যবেক্ষণ করার উদ্দেশ্যে দাতাদের সহযোগীতায় উন্নয়ন করা হয়েছে, তথাপি আমার আশা করছি যে, জলবায়ু বহির্ভূত অন্যান্য যে উন্নয়ন এবং অর্থনৈতিক কার্যাবলিতে সরকার যে অর্থায়ন করছেন তার উপরও স্ব-প্রোদিত বার্ষিক অগ্রগতির প্রতিবেদন জনগনের কাছে প্রকাশ করবেন। এতে সরকার ও জনগন উভয়ই উপকৃত হবে।

### ২. প্রস্তাবিত অর্থবছরে সরকারের জলবায়ু অর্থায়ন প্রস্তাবনা

২০১৮-১৯ অর্থবছরে সরকার ২০টি মন্ত্রণালয়কে জলবায়ু অর্থায়ন প্রক্রিয়ার মধ্যে অন্তর্ভুক্ত করেছেন এবং এই ২০টি মন্ত্রণালয়কে জাতীয় বাজেট থেকে মোট ২,১৪,৮৫১ কোটি টাকার বাজেট বরাদ্দের প্রস্তাব করেছেন যার মধ্যে জলবায়ু পরিবর্তন মোকাবেলায় ১৮,৯৪৮.৭৬ কোটি টাকা রয়েছে বলে সরকার জানিয়েছেন। সরকারও আরও দাবী করেছেন যে প্রস্তাবিত জলবায়ু অর্থায়ন জাতীয় বাজেটের ৮.৮২% এবং মোট জিডিপি'র ০.৭৫% এবং উন্নয়ন বাজেটে এই হার ক্রমান্বয়ে ক্রমবর্ধন। সরকার দাবী করেছেন যে, জলবায়ু পরিবর্তন মোকাবেলায় সরকার প্রধান প্রকল্পনা দলিল “বাংলাদেশ জলবায়ু পরিবর্তন কৌশলপত্র ও কর্মপরিকল্পনা ২০০৯” এর বর্ণিত ০৬ টি থিমটিক এরিয়ার আলোকে (১. খাদ্য, সামাজিক নিরাপত্তা ও স্বাস্থ্য, ২. সমন্বিত দুর্যোগ ব্যবস্থাপনা, ৩. অবকাঠামো উন্নয়ন, ৪. গবেষণা ও জ্ঞান ব্যবস্থাপনা, ৫. কার্বন নিঃসরণ কমানো, ৬. সক্ষমতা বৃদ্ধি এবং প্রাতিষ্ঠানিক ব্যবস্থা শক্তিশালী করা) এবারের জলবায়ু অর্থায়ন প্রস্তাব করা হয়েছে যেখানে থিমটিক এরিয়া- ০১ খাদ্য, সামাজিক নিরাপত্তা ও স্বাস্থ্য সর্বচো বরাদ্দ (৪৬.০১%) এবং থিমটিক এরিয়া-০৩ অবকাঠামো উন্নয়ন দ্বিতীয় সর্বচো বরাদ্দ (২৮.৪৩%) পেয়েছে। এর বাইরে বাকি চারটি থিমটিক এরিয়া বিশেষ করে সমন্বিত দুর্যোগ ব্যবস্থাপনা ৯.৭০%, প্রশমন ও লো-কার্বন ডেভেলপমেন্ট ৬.৬১%, প্রাতিষ্ঠানিক দক্ষতা বৃদ্ধি ৪.৬৮% এবং গবেষণা ও জ্ঞান ব্যবস্থাপনা প্রস্তাবিত জলবায়ু অর্থায়নের ৪.৫৭% পেয়েছে। তবে এখানে বিষয়টি সতর্কতার সাথে বিশ্লেষণ এবং বোঝার বিষয় যে, জলবায়ু অর্থায়নের ক্ষেত্রে ২০টি মন্ত্রণালয়ের জন্য

প্রস্তাবিত উন্নয়ন বাজেট মাত্র ৯,৬৩২ কোটি টাকা যা এই ২০টি মন্ত্রণালয়ের মোট বাজেটের (২,১৪৮৫১.৬৯ কোটি টাকা) মাত্র ৪.৪৮%। তাছাড়া কৃষি, পানি সম্পদ এবং দুর্যোগ এই তিনটি মন্ত্রণালয় জলবায়ু পরিবর্তন মোকাবেলায় সরাসরি উন্নয়ন কার্যক্রমের সাথে জড়িত থাকলেও এবং এদের উন্নয়ন বাজেট প্রস্তাবিত বাজেটের ২০% এরও কম।

### ৩. প্রস্তাবিত জলবায়ু অর্থায়নঃ শুধুমাত্র মন্ত্রণালয়সমূহের অন্তর্ভুক্তি ছাড়া আর নতুন কিছু নাই

এখানে আমরা একথা বলছি এ কারণে যে, জলবায়ু অর্থায়নের ক্ষেত্রে যে ২০টি মন্ত্রণালয়কে অন্তর্ভুক্ত করা হয়েছে এসকল মন্ত্রণালয়সমূহ জলবায়ু বিষয় নিয়ে জাতীয় আলোচনা ও উন্নয়ন কৌশল প্রনয়নের পূর্বেও ছিল। স্বাধীন বাংলাদেশের অর্থনৈতিক পরিকল্পনা বাস্তবায়নের ক্ষেত্রে শুরু থেকেই এসকল মন্ত্রণালয়ের সৃষ্টি হয়েছে। ভৌগলিক অবস্থান বিবচনায় বাংলাদেশ প্রাকৃতিক দুর্যোগের দেশ হিসাবে পরিচিত এবং এসকল মন্ত্রণালয় ধারাবাহিকভাবেই তাদের উন্নয়ন পরিকল্পনায় প্রাকৃতিক দুর্যোগ মোকাবেলা ও খাদ্য স্বয়ংসম্পূর্ণতা অর্জনের ক্ষেত্রে কর্মসূচি গ্রহণ ও বাস্তবায়ন করে আসছে। সুতরাং আমরা দেখতে পাচ্ছি যে, ২০১৮-১৯ অর্থবছরে সরকার জলবায়ু অর্থায়নের ক্ষেত্রে এসকল মন্ত্রণালয়সমূহকে অন্তর্ভুক্ত করার কৌশল গ্রহণ করেছে শুধুমাত্র এবং বরাদ্দ রয়ে গেছে আগের মতই গতানুগতিক। কারন বর্তমানে জলবায়ু পরিবর্তনের কারণে সৃষ্ট প্রাকৃতিক দুর্যোগের তীব্রতা ও ব্যাপকতা বৃদ্ধি পেয়েছে এবং সে অনুসারে এসকল দুর্যোগ মোকাবেলার ক্ষেত্রে সক্ষমতা বৃদ্ধির জন্য গতানুগতিক অর্থায়নের বাইরে অতিরিক্ত অর্থায়নের প্রয়োজন রয়েছে। অন্তর্ভুক্তকৃত ২০ মন্ত্রণালয়ের বাজেটে সেরকম কোন অতিরিক্ত বাজেট বরাদ্দ দেওয়া হয় নাই। এ প্রসঙ্গে আমরা পূর্বেই বলেছি যে, জলবায়ু অর্থায়ন প্রক্রিয়াটি আসলে দাতাদের কাছে প্রতিশ্রুত কমপ্লায়েন্সের অংশ হিসাবে পরিপালন করা হচ্ছে এবং এই কমপ্লায়েন্স বাস্তবায়নের শর্ত হিসাবে সরকার “জলবায়ু ফিসকাল ফ্রেমওয়ার্ক” উন্নয়ন করেছে এবং কোন প্রকার অতিরিক্ত অর্থায়ন ছাড়াই মন্ত্রণালয়সমূহকে যুক্ত করেছে মাত্র। যদি সত্যিকার অর্থেই সরকার এক্ষেত্রে আন্তরিকতা দেখাতো বা সদিচ্ছা থাকতো তাহলে গতানুগতিক অর্থায়ন কৌশলের বাইরে এসে অতিরিক্ত ও প্রয়োজনীয় অর্থায়নের ব্যবস্থা হয়ত গ্রহণ করতো।

### ৪. জলবায়ু পরিবর্তনে আমাদের সমস্যা বৃদ্ধি পেয়েছে

এটা সত্য যে, ভৌগলিক কারণে বাংলাদেশের মানুষ প্রাকৃতিকভাবে অধিক বিপদাপন্ন এবং জলবায়ু পরিবর্তন এই বিপদাপন্নতার মাত্রাকে দিন দিন বাড়িয়ে দিচ্ছে।

বাংলাদেশের মোট জনসংখ্যার প্রায় ৩৫% উপকূলে বসবাস করে এবং সরকারী হিসাব মতেই অতি বিপদাপন্ন জনগোষ্ঠীর সংখ্যা প্রায় ২০ মিলিয়ন। জলবায়ু পরিবর্তনের ফলে বাংলাদেশ সমুদ্রের উচ্চতা বৃদ্ধি, ঘূর্ণিঝড়, জলোচ্ছাস, বন্যা, নদীভাঙ্গন, জলাবদ্ধতা, খরা ও লবনাক্ততা এর মত প্রাকৃতিক দুর্যোগের সম্মুখীন হচ্ছে এবং এর আর্থ-সামাজিক ক্ষয়ক্ষতিও আমাদের কাছে দৃশ্যমান। জলবায়ু পরিবর্তনের ফলে বিগত ৩০ বছরে বাংলাদেশে ২৩৪টি বিভিন্ন ধরনের প্রাকৃতিক দুর্যোগ আঘাত হানা সহ ও প্রায় ০২ লক্ষ প্রানহানীর ঘটনা ঘটেছে। শুধুমাত্র ২০০৭ সালে সংগঠিত ঘূর্ণিঝড় সিডডের কারণে তৎকালীন সময়ে তিন বিলিয়ন ডলার বা আমাদের জিডিপি'র ৫% সম্পদের ক্ষতি হয়েছিল, যা এখনও পুনরুদ্ধার করা সম্ভব হয় নাই, ২০০৯ সালে ঘূর্ণিঝড় আইলার কারণে উপকূলে বেড়ীবাধসমূহের যে ক্ষতি হয়েছে তা আজ পর্যন্ত পূর্ণনির্মাণ বা মেরামত করা সম্ভব হয় নাই। ক্রমাগত সমুদ্র পৃষ্ঠের উচ্চতা বৃদ্ধির কারণে উপকূলীয় এলাকায় লবনাক্ততা বৃদ্ধি পাচ্ছে যা অত্র এলাকার বিশাল জনগোষ্ঠীর জীবনযাত্রাকে ব্যাহত করার পাশাপাশি তাদেরকে বাস্তুচ্যুত করতে পারে। জলবায়ু পরিবর্তনের কারণে বিশ্ব ঐতিহ্য সুন্দরবনের ৭৫ শতাংশ বিলিন হয়ে যাওয়ার আশংকা করা হচ্ছে। খরা মৌসুমে উজানের পানির প্রবাহ কমে যাওয়ার ফলে লবন পানি প্রায় ২৪০ কিঃ মিঃ দেশের অভ্যন্তরে প্রবেশ করছে যার ফলে লবনাক্ত এলাকা দিন দিন বেড়েই চলেছে।

#### ৫. জলবায়ু পরিবর্তন মোকাবেলায় সরকারের প্রতিশ্রুতি ও অর্থায়নের মধ্যে অসামঞ্জস্য প্রতীয়মান

আমরা দেখতে পাচ্ছি য, বৈশ্বিক জলবায়ু আলোচনা শুরু হওয়ার পর থেকেই আমাদের সরকার উক্ত বিষয়টি নিয়ে দেশে এবং আন্তর্জাতিক ফোরামে বেশ সচেচা এবং অতি বিপদাপন্ন দেশ হিসাবে জলবায়ু পরিবর্তন মোকাবেলার বৈশ্বিক সহযোগীতা দাবী করে আসছেন। পাশাপাশি সরকার তার নিজস্ব ক্ষমতায় কি করতে পারেন তা দেখানোর চেষ্টা করছেন যা প্রতিফলন হিসাবে আমরা সরকারের সকল পরিকল্পনায় জলবায়ু পরিবর্তন বিষয়টিকে অগ্রাধিকার সমস্যা হিসাবে দেখেছেন এবং তা মোকাবেলা কার্যকর কৌশল গ্রহন করার প্রতিশ্রুতিও দিয়েছেন। আমরা এর উদাহারন হিসাবে বলতে পারি সরকার তার দীর্ঘমেয়াদী পরিকল্পনা “ভিশন-২০২১”, মধ্যমেয়াদী পরিকল্পনা (৭ম পঞ্চবার্ষিক উন্নয়ন পরিকল্পনা) এবং জাতীয় বাজেটে সবখানেই জলবায়ু পরিবর্তনজনিত সমস্যাসমূহ উল্লেখ করেছেন এবং বলেছেন এসকল সমস্যা কার্যকরভাবে মোকাবেলায় ব্যর্থ হলে দেশের উন্নয়ন বাধাগ্রস্ত হতে পারে এবং দারিদ্রতাও বাড়তে পারে। যে কারণে গতানুগতিক উন্নয়নের বাইরে অতিরিক্ত কর্মকৌশল প্রনয়ন করতে হবে এবং অতিরিক্ত অর্থায়নও নিশ্চিত করতে হবে। এই ভাবনা থেকে সরকার ২০০৯ সালে বিসিসিএসএপি প্রনয়ন করেছেন এবং গতানুগতিক অর্থায়নের বাইরে প্রতি বছর অতিরিক্ত ০৫ বিলিয়ন ডলার (প্রায় ৪০,০০০ কোটি টাকা) বিনিয়োগ চাহিদা প্রনয়ন করছেন শুধুমাত্র জলবায়ু

পরিবর্তন মোকাবেলা করে উন্নয়ন গতি ঠিক রাখার জন্য। সরকারের বাইরে বিশ্বব্যাপক জলবায়ু পরিবর্তন মোকাবেলায় অতিরিক্ত অর্থায়নের চাহিদা বিশ্লেষণ করেছে এবং বলেছে যে ২০৫০ সাল নাগাদ প্রতি বছর ১৬৬ মিলিয়ন ডলার বিনিয়োগ প্রয়োজন হবে। কিন্তু বাস্তবতা হচ্ছে সরকার প্রতিশ্রুতি ও পরিকল্পনা করলেও এক ডলারও অতিরিক্ত বিনিয়োগ নিশ্চিত করে নাই যা আমরা প্রকৃত অর্থে জলবায়ু অর্থায়ন বলতে পারি।

#### ৬. বার্ষিক উন্নয়ন পরিকল্পনায় প্রস্তাবিত বিনিয়োগঃ নিশ্চিত হচ্ছে না বিপদাপন্ন জনগণের অগ্রাধিকার

বাংলাদেশ জলবায়ু পরিবর্তন পরিকল্পনা এবং সরকারের সপ্তম পঞ্চবার্ষিক পরিকল্পনায় এটা স্পষ্ট করে বলা হয়েছে যে, কোন উন্নয়নই টেকসই হবে না যদি জলবায়ু পরিবর্তন প্রভাব কার্যকরভাবে মোকাবেলা করা সম্ভব না হয়। জলবায়ু পরিবর্তন মোকাবেলা কৌশলে বাংলাদেশের অগ্রাধিকার উন্নয়নের খাত হচ্ছে অভিযোজন খাতে প্রয়োজনীয় বিনিয়োগ নিশ্চিতকরণ, যেটা সরকার স্বীকার করে। কিন্তু সরকারের বার্ষিক উন্নয়ন পরিকল্পনা বা আসন্ন অর্থবছরের এডিপিতে যোগাযোগ এবং বিনিয়োগ আবকাঠামোর উন্নয়নসমূহ সরকারের অগ্রাধিকার পেয়েছে এবং অভিযোজন খাতের অবকাঠামো বিশেষ করে উপকূলীয় এলাকার সুরক্ষায় বাঁধ নির্মাণ ও উন্নতকরণ, লবনাক্ততা দূরীকরণ এবং সেচ ও সুপেয় পানি সরবরাহ ইত্যাদি খাতের অবকাঠামো উন্নয়নে গুরুত্ব অনেক কম পরিলক্ষিত হচ্ছে। এটা অস্বীকার করার উপায় নেই যে উন্নয়নের জন্য এসকল বিনিয়োগে প্রয়োজন নাই, কিন্তু উপকূলীয় এলাকার সুরক্ষা নিশ্চিত করা ছাড়া অন্যান্য বিনিয়োগের ফলাফল হবে অনেকটাই অর্থহীন। জলবায়ু পরিবর্তনের কারণে বাংলাদেশের উপকূলীয় এলাকায় ৩০-৪০ মিলিয়ন জনগোষ্ঠী ক্রমাগতভাবে বিপদাপন্নতার মধ্যে রয়েছে। এসকল বিপদের মধ্যে রয়েছে ঝড়-জলোচ্ছাস, নদীভাঙ্গন, সমুদ্রপৃষ্ঠের উচ্চতা বৃদ্ধি। তাছাড়া লবনাক্ততা বৃদ্ধির কারণে কৃষিকাজের সম্ভাবনা ক্রমশই নিশেষ হয়ে যাচ্ছে। যে কারণে টিকে থাকাটাই হচ্ছে জনগণের অগ্রাধিকার চাহিদা এবং টিকে থাকার উদ্দেশ্যে বিশাল জনগোষ্ঠীর শহরমুখী অভিবাসন প্রবনতা বৃদ্ধি পাচ্ছে বলে সবাই মনে করেন। সুতরাং বিপদাপন্ন জনগোষ্ঠীর অতিমাত্রায় অভিবাসন সরকারের অন্যান্য বিনিয়োগ সুফলের উপর চাপ প্রয়োগ করবে এটা আর বলার অপেক্ষা রাখে না।

#### ৭. উপকূলীয় এলাকার বর্তমান অবস্থা এবং অভিযোজন খাতের অগ্রাধিকার চাহিদা

#### ক. বিপদাপন্ন জনগোষ্ঠীর রক্ষায় বাঁধ মেরামত ও উন্নয়ন হওয়া উচিত অগ্রাধিকার বিনিয়োগ খাত

বাংলাদেশের উপকূলীয় এলাকায় ৬০'এর দশকে বেড়ীবাঁধসমূহ তৈরী হয়েছিল মূলত; সাগরের জোয়ার ও জলোচ্ছাস থেকে রক্ষা কৃষি জমিসমূহ রক্ষা করা এবং কৃষি বিল্ব সংগঠিত করার উদ্দেশ্যে। যে কারণে বাঁধের উচ্চতা সাগরের সাধারণ

জোয়ারাধারকে মাথায় রেখেই ঠিক করা হয় এবং সে অনুসারে নির্মাণ করা হয়েছিল। তবে সময়ের বিবর্তনে বর্তমানে এসকল বাধের অধিকাংশই বিগত ছয় দশকে প্রাকৃতিক দুর্যোগ বিশেষ করে ঝড়-জলোচ্ছ্বাসের কারণে ক্ষতিগ্রস্ত এবং উচ্চতাহ্রাস পেয়েছে। সরকারের সংরক্ষিত তথ্যানুসারে সারাদেশে প্রায় ৭৫৫৫ কিঃমিঃ বাঁধ রয়েছে। এর মধ্যে উপকূলীয় এলাকার বাধের পরিমাণ প্রায় ৪০০০ কিঃমিঃ। এসকল বাধ সময়মত ও পরিকল্পনা মাফিক মেরামত ও রক্ষনাবেক্ষণ করা হচ্ছে না। পাশাপাশি জলবায়ু পরিবর্তনের কারণে ক্রমবর্ধমান প্রাকৃতিক দুর্যোগ ও জলোচ্ছ্বাস এসকল বাধের ক্ষয়ক্ষতি আরও বৃদ্ধি করছে। ফলে জনগনের জীবন-সম্পদের ঝুঁকিও বৃদ্ধি পাচ্ছে। বিশ্বব্যাংকের তথ্যমতে উপকূলীয় এলাকা বাংলাদেশের মোট ভূমির ৩২% এবং ২০৫০ সাল নাগাদ সেখানে জনসংখ্যা দাঁড়াতে পারে প্রায় ৬০ মিলিয়ন। জনসংখ্যার এই ক্রমবর্ধমান হার মানুষকে বাধ্য করছে অতিবিপদাপন্ন উপকূলীয় এলাকায় অভিবাসন এবং বসবাস করতে বাধ্য হচ্ছে। সুতরাং সরকারের দায়িত্ব রয়েছে এই বিশাল অভিবাসী দরিদ্র জনগোষ্ঠীকে পরিকল্পনা মাফিক সমর্থন দেওয়া যাতে তাদের জীবনযাত্রা অধিকতর নিরাপদ হয়।

খ. বাধ উন্নয়নের দায়িত্ব সরকার বিশ্বব্যাংক ও এডিবি'র হাতে ছেড়ে দিয়েছেন

আমরা দেখতে পাচ্ছি প্রতি বছর সরকার আভ্যন্তরীণ সম্পদ সংগ্রহের পরিমাণ বাড়তে পারলেও তার ৮০-৯০% বরাদ্দ যাচ্ছে অনুন্নয়ন খাতে। আমাদের মাননীয় অর্থমন্ত্রী বার্ষিক উন্নয়ন পরিকল্পনা বাস্তবায়নে দেশীয় সম্পদের বর্ধিত যোগান নিশ্চিত করার বুলি আওরালেও বাস্তবে তা দেখাতে পারছেন না (কারণ ১৮-১৯ বছরেও মোট রাজস্বের ৮৪% যাবে অনুন্নয়ন খাতে এবং ১৭৩,০০০ কোটি টাকার বার্ষিক উন্নয়ন কর্মসূচিতে মাত্র ৫০-৬০ হাজার কোটি টাকা যোগান দিতে পারবেন রাজস্ব খাত থেকে)। মাননীয় মন্ত্রী টেকসই উন্নয়ন নিশ্চিতকরণে জলবায়ু পরিবর্তন মোকাবেলার ক্ষেত্রে অভিযোজন কর্মসূচির গুরুত্ব স্বীকার করলে কিন্তু বাধসমূহের উন্নয়নের জন্য উপকূলীয় এলাকায় প্রয়োজনীয় বরাদ্দ না দিয়ে তিনি তা বিশ্বব্যাংক এবং এডিবি'র হাতে ছেড়ে দিয়েছেন। এখানে বাস্তবতা হচ্ছে বিশ্বব্যাংক এবং এডিবি কিন্তু তাদের স্বার্থ (?) নিশ্চিত না হওয়া পর্যন্ত কোন প্রকার অর্থায়ন করছে না। যে কারণে উপকূলীয় এলাকার সুরক্ষায় সময়মত প্রয়োজনীয় অর্থ বরাদ্দ পাওয়া যাচ্ছে না। বর্তমানে বিশ্বব্যাংক এবং এডিবি'র অর্থায়নে উপকূলীয় বাধ উন্নয়ন কর্মসূচী **Coastal Embankment Improvement Program (Phase-01)** নামে ২০২০ সাল পর্যন্ত পাঁচ বছর মেয়াদী একটি প্রকল্প বাস্তবায়ন করা হচ্ছে। জানামতে উক্ত প্রকল্পে উপকূলীয় এলাকায় ১৭টি পোল্ডারের বাধসমূহের মেরামত এবং উন্নয়ন করা হবে এবং অর্থায়নের পরিমাণ প্রায় ৩০০ মিঃ ডলার। তবে প্রথম পর্যায়ের ফলাফলের উপর ভিত্তি করে প্রকল্পের দ্বিতীয় পর্যায়ের সম্প্রসারণ হতে পারে যেখানে অর্থায়নের পরিমাণ ০২ বিলিয়ন ডলারের মত। তবুও

এই পরিমাণ কর্মসূচি উপকূলীয় জনগোষ্ঠীর চাহিদার তুলনায় খুবই নগন্য, কারণ জলবায়ু পরিবর্তন মোকাবেলায় শুধুমাত্র পেল্ডারসমূহ নয় বরং সমস্ত বাধের মেরামত এবং উন্নয়ন জরুরী এবং এটাই জনগনের অগ্রাধিকার চাহিদা বলে আমরা মনে করি।

৮. ২০১৮-১৯ প্রস্তাবিত বাজেট ও জলবায়ু অর্থায়নের ক্ষেত্রে আমাদের দাবী

ক. জলবায়ু পরিবর্তন কার্যকরভাবে মোকাবেলার জন্য সরকারকে অতিরিক্ত বরাদ্দ ও বিনিয়োগ নিশ্চিত করতে হবে

এটা এখন সার্বজনীন সত্য যে গতানুগতিক অর্থায়ন কৌশল জলবায়ু বিপদাপন্নতা থেকে আমাদেরকে রক্ষা করতে পারবে না। আবার জলবায়ু পরিবর্তনের কারণে আমাদের বিপদাপন্নতার কথা বলে বৈশ্বিক সহযোগীতার দিকে চেয়ে বসে থাকলেও আমাদের চলবে বলে মনে হয় না। আমরা বৈশ্বিক সহযোগীতার আশায় জলবায়ু বিষয়ক “ফিসকাল স্ট্রেক্চরাল অ্যাডজাস্টমেন্ট” প্রণয়ন করেছি এরকম ধ্যান ধারণা পোষণ করলে উক্ত সমস্যা মোকাবেলায় যে অতিরিক্ত কর্মকৌশল ও অর্থায়ন প্রয়োজন তা নিশ্চিত করা আমাদের জন্য সুদূর পরাহত হতে পারে বলে আমরা মনে করি।

দ্বিতীয়তঃ আমরা নিজেদের বাস্তব সমস্যা বিবেচনা করে এবং তা নিরসনকল্পেই জলবায়ু পরিবর্তন পরিকল্পনা-২০০৯ প্রণয়ন করেছিলাম এবং সেখানে বলা হয়েছিল জলবায়ু বিপদাপন্নতা থেকে রক্ষা পেতে হলে উপকূলীয় এলাকায় অভিযোজন খাতকে অগ্রাধিকার দিতে হবে এবং উন্নয়ন বিনিয়োগ বিশেষ করে জলবায়ু অর্থায়ন-কেন্দ্রিক উন্নয়ন বিনিয়োগ ২০১০ সাল থেকে ২০২০ সাল পর্যন্ত জিডিপি'র কমপক্ষে ১% পর্যন্ত বৃদ্ধি করতে হবে। হতাশাজনক হচ্ছে সরকার তার গতানুগতিক উন্নয়ন বিনিয়োগকে জলবায়ু অর্থায়নের রূপান্তর করার চেষ্টা করেছেন যেটা কখনই জিডিপি'র ১% অতিরিক্ত বিনিয়োগ হিসাবে আসলে গন্য করা যায় না। সুতরাং সরকারকে অতিরিক্ত বিনিয়োগ নিশ্চিত করতে হবে এবং তা বর্তমান বিনিয়োগের বাইরে হতে হবে।

খ. জলবায়ু অর্থায়ন-কেন্দ্রিক উন্নয়ন বিনিয়োগের জন্য অগ্রাধিকার খাত নির্ধারণ করতে হবে

সরকার প্রস্তাবিত বাজেটে অবকাঠামো খাতকে অগ্রাধিকার খাত হিসাবে নির্ধারণ করেছেন। বাজেট বরাদ্দের প্রস্তাব বিশ্লেষণে এট সহজেই অনুমেয় যে, সরকার প্রবৃদ্ধি-কেন্দ্রিক অবকাঠামোকে অতিরিক্ত গুরুত্ব দিয়েছেন এবং বাজেট বরাদ্দের প্রস্তাব করেছেন। আমরা এর বিরোধী নই তবে প্রবৃদ্ধি টেকসই হবে না যদি অভিযোজন কেন্দ্রিক অবকাঠামোকে (বাঁধ, সাইক্লোন সেল্টার, উপকূলীয় বনায়ন ইত্যাদি) গুরুত্ব দেওয়া না হয়। বিসিসিএসএপি ২০০৯'র প্রাক্কলন অনুসারে ৬,০০০ কিঃমিঃ উপকূলীয় বাঁধ নির্মাণ প্রয়োজন যার জন্য প্রয়োজনীয় বাজেট

বরাদ্দ নেই, ২,০০০টি সাইক্লোন সেন্টার, ২০০টি বন্যায় আশ্রয় কেন্দ্র তৈরী এবং ৯,০০০ কিঃ মিঃ বনায়ন করার সুপারিশ থাকলেও সে অনুসারে কোন বাজেট বরাদ্দ আমরা প্রস্তাবিত বাজেটে দেখছি না।

**গ. কার্যকর জলবায়ু অর্থায়নের লক্ষ্যে জাতীয় অভিযোজন পরিকল্পনা প্রনয়ণ করতে হবে**

সরকার বৈশ্বিক অর্থায়নের আশায় জাতীয় অভিযোজন পরিকল্পনা প্রনয়ন কাজ হতে নিয়েছে। আমরা মনে করি এটা কোন দাতাদের পরামর্শের কারনেই করতে হবে এমন নয় বরং নিজেদের স্বার্থে দীর্ঘমেয়াদী অভিযোজন কৌশল এবং সর্বপোরি উন্নয়নকে টেকসই করার জন্যই এই পরিকল্পনা প্রয়োজন রয়েছে এবং যত তাড়াতাড়ি করা যায় ততই আমাদের করণীয় সুনির্দিষ্ট ও কার্যকর হবে। তবে এই অভিযোজন পরিকল্পনা অবশ্যই হতে হবে জনঅংশগ্রহন নিশ্চিত করা এবং তাদের মতামতের ভিত্তিতেই, কোন তথ্যকাথিত বিশেষজ্ঞের চাপিয়ে দেওয়া মতামতের ভিত্তিতে নয়।

**গ. সরকারকে বাস্তবায়ন ব্যবস্থাপনা নীতিমালা প্রনয়ন করতে হবে এবং অর্থায়ন করতে হবে**

এটা বৈশ্বিকভাবে স্বীকৃত যে বাংলাদেশ হচ্ছে দুর্যোগের ক্ষেত্রে সর্বাধিক ঝুঁকিপূর্ণ দেশ। লাখ লাখ মানুষ প্রতি বছর দুর্যোগের কারনে ক্ষয়ক্ষতির শিকার হয়ে জীবন-জীবিকার তাগিদে স্থায়ী অথবা অস্থায়ীভাবে অভিবাসিত হতে বাধ্য হচ্ছে। তাছাড়া একথাও স্বীকার করতে হবে যে, দুর্যোগ পূর্বেও ঘটেছে এবং বর্তমানেও ঘটছে। কিন্তু এসকল দুর্যোগের ব্যাপকতা, পুনর্পৌনিকতা এবং তীব্রতা যোভাবে বেড়েছে তা অবশ্যই দীর্ঘসময়ের জলবায়ু পরিবর্তনের কারনে বেড়েছে। উদাহারন সরুপ বলা যায় জলবায়ু পরিবর্তনের অভিঘাত হিসাবে যদি সমুদ্রপৃষ্ঠের উচ্চতা ১ মিটার বৃদ্ধি পায় তাহলে ভবিষ্যতে উপকূলীয় এলাকার প্রায় ৪০-৪৫ মিলিয়ন লোক বাস্তবায়ন

হওয়ার আশংকা রয়েছে। এই বিশাল বাস্তবায়ন জনগোষ্ঠী দেশের ভূমি ও অর্থনীতির উপর বিশাল চাপ সৃষ্টি করবে, অন্যদিকে এসকল বাস্তবায়ন জনগোষ্ঠীর জীবনযাত্রা সচল রাখার ক্ষেত্রে সরকারের কার্যকর সামর্থ্যের অভাবে দারিদ্রতা আরও প্রকট আকার ধারণ করতে পারে। সুতরাং ভবিষ্যতে সরকারকে বাস্তবায়ন জনগোষ্ঠীর কার্যকর ব্যবস্থাপনা নিশ্চিত করতে হলে এ বিষয়ে একটি নীতিমালা অবশ্যই প্রনয়ণ করতে হবে এবং সে অনুসারে প্রয়োজনীয় অর্থায়ন নিশ্চিত করতে হবে।

**ঘ. জলবায়ু অর্থায়ন হতে হবে স্বচ্ছতা ও জবাবদিহীতার ভিত্তিতে**

জলবায়ু পরিবর্তনের ঝুঁকি মোকাবেলায় জনগনের সক্ষমতা বৃদ্ধি এবং বাংলাদেশ জলবায়ু পরিবর্তন কৌশল কর্ম পরিকল্পনা ২০০৯ বাস্তবায়নের জন্য সরকার ২০০৯ সালে জলবায়ু পরিবর্তন ট্রাস্ট ফান্ড গঠন করে এবং এ পর্যন্ত মোট ৩,২০০ কোটি টাকা বরাদ্দ দেওয়ার পাশাপাশি প্রায় ৪০০ এর অধিক উন্নয়ন প্রকল্প সরকারের বিভিন্ন মন্ত্রণালয় এবং এনজিওসমূহের মাধ্যমে বাস্তবায়ন করে। কিন্তু বাস্তবায়নকৃত এসকল প্রকল্পের দ্বারা জলবায়ু পরিবর্তন মোকাবেলা আসলে কতটুকু সম্ভব হয়েছে তা এখন পর্যন্ত প্রশ্নই রয়ে গেছে। এখনও ট্রাস্ট ফান্ড থেকে অর্থ বরাদ্দের ক্ষেত্রে সরকারের বিভিন্ন মন্ত্রণালয়সমূহ তাদের অযাচিত প্রভাব খাটানো এবং জলবায়ু প্রকল্প দেখিয়ে অন্য প্রকল্প বাস্তবায়নের মাধ্যমে আর্থিক অনিয়মের খবর পত্র-পত্রিকায় আমরা দেখতে পাচ্ছি। আমরা মনে করি সরকারের ট্রাস্ট ফান্ড থেকে অর্থায়নের প্রক্রিয়াকে একটি সু-শাসনের মধ্যে আনতে হবে এবং তা করা সম্ভব শুধুমাত্র এর ব্যবস্থাপনায় সকল পর্যায়ের স্টেকহোল্ডারদের অন্তর্ভুক্তিকরনের মধ্য দিয়ে। এছাড়া ট্রাস্ট ফান্ড থেকে প্রকল্প অনুমোদন, অর্থ ছাড় এবং বাস্তবায়ন বিষয়ক তথ্য জনগনের কাছে প্রকাশ করতে হবে এবং বাস্তবায়ন ও মূল্যায়ন প্রক্রিয়ায় জন সম্পৃক্ততার নীতি গ্রহন করতে হবে।

আয়োজক সংগঠক: বাপা, বিপনেট-সিসিবিডি, সিডিপি, সিসিডিএফ, সিপিআরডি, বিসিজেএফ, এফইজেবি, বিসিএএস এবং ইকুইটিবিডি

সচিবালয়ঃ কোস্ট ট্রাস্ট, বাড়ি ১৩, মেট্রো মেলডি (১ম তলা), সড়ক-০২, শ্যামলী, ঢাকা ১২০৭।

ফোন: +৮৮-০২-৮১২৫১৮১, ৮১৫৪৬৭৩, ফ্যাক্স: +৮৮-০২-৯১২৯৩৯৫, ইমেইল: [info@coastbd.net](mailto:info@coastbd.net)

ওয়েব: [www.equitybd.net](http://www.equitybd.net) [www.coastbd.net](http://www.coastbd.net)